

Minister Dangui Oduber a haci bishita na Proyecto Gateway 2030

ORANJESTAD – Diabierna atardi Minister di Turismo, Dangui Oduber tabata presente na e spantenbier di e edificio nobo di utilidad na aeropuerto, na unda e mandatario a duna un discurso. E edificio di Utilidad aki ta forma parti di e proyecto di expansion Gateway 2030. Gateway 2030 ta un proyecto cu tin un inversion general di 500 miyon florin y cu ta genera hopi trabou.

Actualmente e edificio di Utilidad cu ta den uzo ta esun na e terminal di e aeropuerto, pero esaki ya caba ta "outdated". Ora e edificio di Utilidad nobo ta den funcion, e bieu lo wordo kita pa asina por sigui cu e parti di expansion di e terminal. E edificio nobo lo tin su mesun "solar panel" y lo zorg pa e coriente (general y di emergencia), tambe e lo zorg pa e awa (sprinkler, portabel y friu). Acerca tambe lo bin un cas di guardia nobo cu lo reemplaza e entrada principal existente di vehiculo pa bay na e "airside". Tur esakinan ta elementonan sumamente importante pa e realisacion di Gateway 2030 den su totalidad.

Segun e comunicado cu Bon Dia Aruba a ricibi, ta indica cu e fase di construccion ta casi cla despues cu dialuna pasa e yega na e parti mas halto cu ta e prome "cooling towers".

E actividad di construccion principal lo keda completa prome cu e aña 2020. E edificio di Utilidad nobo ta planea pa ta operacional den e prome dos lunanan di aña 2020, esaki despues di haci tur e test necesario, e start op y transicion di e utilidad bieu pa e nobo.

E ta di sumamente importancia pa e edificio di utilidad nobo keda cla y ta operacional. Teniendo na cuenta e importancia di e aeropuerto, pa Aruba y su turismo en general. A diseña y construi e edificio cu standardnan hopi halto pa absorba mal tempo manera horcan y tambe temblor. Banda di esaki e edificio ta hopi eficiente na energia, hopi confiabel y redundancia.

Minister Dangui Oduber, den nomber di Gobierno di Aruba, a manda palabranan di gradicimento na tur stakeholder's pa nan trabou, compromiso y cooperacion pa cu e proyecto. Minister Oduber a manda un danki pa WEB, Elmar, DOW y DTI pa nan cooperacion den e proyecto. Na final e mandatario a manda un danki special na tur e contratistanan. Finalmente, Minister Oduber a yama danki na cada un di e trahadonan cu ta haci proyecto Gateway 2030 posibel, y alabes a recorda nan pa semper tene nan seguridad personal y di otro na prome luga.

